

## Morning Regional Dogri News Bulletin, 29<sup>th</sup> April 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

### Headlines

- उधमपुर च आतंकवादिएं कन्नै टाकरे दरान इक ग्राम रक्षा गार्ड शहीद। आतंकवादिएं गी फगड़ने लेई शुरू तुपाई अभियान अजे बी जारी ऐ।
- सोनामर्ग दे गांदरबल शिड़क हादसे च चऊं जनें दी मौत 2 लापता। उपराज्यपाल मनोज सिन्हा होरें हादसे पर दुख प्रगट कीता।
- बीजेपी नेता ते प्रधानमंत्री नरेन्द्र मोदी होरें भारत गी इक निग्गर सुरक्षत ते विकसित राष्ट्र बनाने दी अपनील गारंटी दी परतिये जकीनी दहानी कीती ऐ।
- प्रशासनिक सचिवें गी रीनगर ते जम्मू दौनें सचिवालये च उपलब्ध रौहना जकीनी बनाने दा निर्देश जारी कीता ऐ।

<><><><><><>

### ADGP-Udhampur

विलेज डिफेंस गार्ड दा मिंबर कल उधमपुर जिले दे दूर दरेड़े ग्रां च आतंकवादिएं कन्नै होए दे टाकरे च शहीद होई गेआ। जम्मू जोन दे एडीजीपी आंनद जैन होर उर्थें तुरत उर्थें पुज्जे तां जे चलाए जा'रदे आतंकवादी रोधी अणियान दी निगरानी करी सकन। आतंकवादिएं दी धर-फगड़ लेई व्यापक पैमाने पर तपाशी अभियान चलाया गेआ ऐ। इनें आतंकवादिएं पाकिस्तानी आली भेठा दा घुसपैठ कीती ही। एडीजीपी होरें आक्खेआ जे इलाके च आतंकवादिएं दे 2 गुट मजूद न। उनें आक्खेआ.....

बसंतगढ़ पुलस थाने च शहीद वीडिजी मिंबर मोहम्मद शरीफ होरें गी श्रद्धांजलि देने लेई कार्यक्रम दा सरिस्ता कीता गेआ। एडीजीपी होरें राष्ट्र दी सेवा लेई दित्ते गेदे मोहम्मद शरीफ हुं दे स्वोच्च बलिदान गी नमन कीता।

<><><><><><>

## Kashmir Accident

कश्मीर घाटी च कल संजा श्रीनगर लेह जरनैली शिडकै पर सैलानिएं गी लेइयै जा'रदी इक गड्डी दे गगनगीर सोनामर्ग इलाके च शिडकै पर रूलकियै सिंध नाले च जाई पौने दे बाद चलाए गेदे तुपाई ते बचाह अभियान दरान चऊं जनें दियां लोथां बरामद करी लैतियां गेदियां न। अधिकारिएं मूजब हादसे बारे जानकारी थ्होंदे गै पुलस, फौज ते फौजी दी 34 असम राईफल्स, ट्रैफिक पुलस ग्रामीण, सिविल प्रशासन, मकामी लोकें, एसडीआरएफ ते एनडीआरएफ नै रलियै बचाह अभियान चलाया। मगरा तेज बरखा ते मौसम बड़ा मता खराब होने दे बाद अभियान रोकने तगर 4 लोथां बरामद करी लैतियां गेदियां हियां। उपराज्यपाल मनोज सिन्हा होरें सोनामर्ग हादसे च होए दे जानी नुक्सान पर दुख प्रगट करदे होई प्रभावतें गी नियमें मूजब हर मुमकिन सहायता मदाद देने दा निर्देश जारी कीता ऐ।

<><><><><><>

## PM-Modi

भारतीय जनता पार्टी दे वरिष्ठ नेता ते प्रधानमंत्री नरेन्द्र मोदी होरें कल कर्नाटक दे सिरसी, दवानगेरे ते बेलगावी च रैलिएं गी संबोधत कीता। उनें भारत गी शक्तिशाली बनाने ते विकास ते सुरक्षा जकीनी करने दी अपनी गरंटी दा भरोसा दोआया। उनें आक्खेआ जे पिछले 10एं ब'रें च उंदी सरकार नै करसान उत्पादक संगठन राएं लौहके करसानें दी लागत गी घट्ट करने ते कृषि उपज आस्तै बजार खोलने च मदद कीती ऐ। उनें राज्य गी कांग्रेस सरकार पर प्रधानमंत्री कृषि करसान योजना राएं करसानें गी दित्ते जाने आले 4 जहार रपे च कटौती करने दा आरोप लाया। प्रधानमंत्री होरें लोकें गी 7 मई गी खरी मती च बाहर आइयै वोट पाने दी अपील कीती।

<><><><><><>

## Rahul Gandhi

कांग्रेस दे वरिष्ठ नेता राहुल गांधी होरें कल ओडिशा दे केन्द्र पाडा हल्के तैहत सलिपुर च अपनी पार्टी दे मेदवार दे समर्थन च प्रचार कीता। राहुल गांधी होरें चुनावी रैली च वायदा कीता जे केन्द्र च जेकर उंदी पार्टी सत्ता च आई तां बेरोजगार नोजवानें आस्तै पैहली नौकरी पक्की योजना लागू कीती जाग। एहदे थमां पैहले गांधी होरें उत्कल गौरव मधुसूदन दास हुंदे जन्म दिन पर कटक जिले दे सत्य सामापुर च उंदी जद्दी ग्रं जाइयै उंदी मूर्ति पर माला चाढी।

<><><><><><>

## Guj. Pak Boat

भारतीय तटरक्षक बल नै सांझे अभियान च गुजरात दे पोरबंदर तट पर इक पाकिस्तानी किश्ती थमां 6 सौ करोड़ रपे दी कीमत दे 86 किलोग्राम नशीले पदार्थ जब्त कीते न। इस किश्ती पर सुआर 14 लोकें गी बी गिरफ्तार कीता गेआ ऐ। जारी सरकारी विज्ञप्ति मूजब गुजरात आतंकवाद रोधी दस्ते ते एनसीबी नै सांझे तौर पर अरब सागर च कारवाई कीती। पाकिस्तानी किश्ती गी अग्गे दी जांच लेई पोरबंदर आन्नेआ गेआ। पिछले त्रै ब'रे च भारतीय तटरक्षक बल ते होर दुए अजेंसिएं दा एह इस चाल्ली दा 11मां सफल अभियान ऐ।

<><><><><><>

## Highway

जम्मू श्रीनगर राष्ट्रीय जरनैली शिड़कै पर केई थाहरें पस्सियां ते पहाड़ें पर कुप्पड़ पौने कारण गड्डिडएं दी आओजाई बंद रखी गेदी ऐ। जानकारी मूजब रामबन जिले दे मेहड़, गांगरू ते किश्तवाड़ी पत्थर इलाकें च पहाड़ें पर कुप्पड़ ते ल्हास पस्सियां पौने कारण राष्ट्रीय जरनैली शिड़कै गी गड्डिडएं दी आओजाई लेई बंद रखेआ गेदा ऐ। लोकें गी सलाह दित्ती गेई ऐ जे ओ मौसम साफ ते शिड़कै दे खोली दित्ते जने पर गै इस रस्ते पर यात्रा दी तैआरी करन।

<><><><><><>

## Adm. Summers

जम्मू कश्मीर सरकार नै सब्बने प्रशासनिक सचिवें गी औंदी पैहली मई थमां सिविल सचिवालय श्रीनगर च अपनी हाजरी जकीनी बनाने दा निदेश जारी कीता ऐ। प्रशासनिक सचिवें गी कम्में दी लोड़ मूजब सिविल सचिवालय जम्मू च मजूद रौहने लेई आक्खेआ गेआ ऐ जे दौनें सचिवालय थाहरें पर कम्म करोग ते प्रशासनिक सचिव दौनें थाहरें पर बवसीआ आले ढंगै सिर दफ्तर दे कम्मकाज गी जकीनी बनांगनं

<><><><><><>

## Amit Shah

भारतीय जनता पार्टी दे वरिष्ठ लीडर ते गृहमंत्री अमित शाह होरें जोर देइयै आक्खेआ ऐ जे उंदी पार्टी एससी, एसटी ते ओबीसी कोटें च कुसै चाल्ली दा बदलाव नेई होन देग। कल मेनपुरी उत्तर प्रदेश च इक चुनां रैजी गी संबोधत करदे होई उनें एह गल्ल आक्खी। तोआई समाजवादी पार्टी दे प्रमुख अखिलेश यादव होरें कल सम्भल ते बरेली जिले च अपनी पार्टी दे मेदवारें लेई प्रचार कीता। सम्भल च चुनां रैली दरान बीजेपी दी नुक्ताचीनी करदे होई अखिलेश यादव होरें आक्खेआ जे लोकें चुनां दे पैहले दुए गेड़ दरान गै बीजेपी गी बनकदा परता देई दित्ते दा ऐ।

मायावती हुंदी बहुजन समाज पार्टी दे तालमेल अधिकारी आकाश आनंद होरें सीतापुर जिले च कल इक चुनां रैली च योगी सरकार च आम लोक टकोहदा करियै अनुसूचित जातिएं दे लोक सुरक्षत नेई न।

<><><><><><>

CDS Chowhan

रक्षा प्रमुख सी.डी.एस अनिल चौहान होरें अपनी फ्रांस दी यात्रा मुकम्मल करी लैती ऐ। रक्षा मंत्रालय आस्सेआ जारी इक जानकारी मूजब इस यात्रा कन्नै भारत ते फ्रांस बश्कार रणनीतिक सांझ भ्याली दे होर निग्गर होने दी तस्दीक होई ऐ ते दौनें मुखे दे दपक्खी रक्षा सैहयोग गी होर मजबूती थहोई ऐ। रक्षा प्रमुख हुंदी फ्रांस दे नागरिक ते सैन्य निदेशक ते कैबिनेट सतह दे थेआरबंद बले सरबंधी मंत्री लैफिटनेंट जनरल विसेंट गिरौड़ हुंदे कन्नै गल्लबात च सांझे हितें ते आपसी सुरक्षा सरोकारें पर बी तफसीली सलाह सूत्र ते बचारें दा अदान प्रदान कीता गेआ ऐ।

<><><><><><>

Mines

खानें सरबंधी मंत्रालय महत्वपूर्ण खनिजें बारे अज्जै थमां नमीं दिल्ली च दऊं दिनें दे इक सम्मेलन दा सरिस्ता करा करदा ऐ। एह आयोजन शक्ति सतत ऊर्जा फाउंडेशन, ऊर्जा पर्यावरण त जल परिषद ते सतत विकास सरबंधी भारतीय संस्थान दे सैहयोग कन्नै कीता जा'रदा ऐ। मंत्रालय मूजब एह सम्मेलन भारत दे तेजिया कन्नै आर्थिक विकास ते स्वच्छ ऊर्जा दे लक्ष्यें गी दिक्खदे होई आयोजित कीता जा'रदा ऐ तां जे महत्वपूर्ण कच्चे माल दी घेरलु दस्तेयाबी जकीनी बनी सकै। दऊं दिनें दे इस सम्मेलन च उद्योग जगत दे प्रतिनिधिएं, स्टार्ट अप्स, वैज्ञानिकें, शिक्षाविदे ते नीति माहिरें दे इलावा दुनियां भरै थमां खनिजें कन्नै जुड़े दे लोकें दे शामिल होने दी मेद ऐ।

<><><><><><>

IPL

आईपीएल क्रिकेट च कल रातीं चेन्नई दे एम.ए.चिदंबरम स्टेडियम च खेड्डे गेदे मैच च चेन्नई सुपर किंग्स नै सनराईजर्स हैदराबाद गी 78 रंजें कन्नै हराई दित्ता। चेन्नई दी तरफा तुषार देशपांडे नै 4 विकटां लैतियां ते मथीशा पथिराना दी 2 महत्वपूर्ण विकटां लेइयै सनराईजर्स हैदराबाद गी 18 ओवरें ते 5 गेंदें च 134 रंजें पर समेटी दित्ता।

एह्दे शा पैह्ले बल्लेबाजी करने लेई उतरी दी चेन्नई सुपर किंग्स दी टीमै 20एं ओवरें च 3 विकटें दे नुक्सान पर 212 रंजें बनाए। कप्तान ऋतुराज गायकवाड़ नै 54एं गेंदें च 98 रंज बनाए। जिसलै कि डेरिल मिशेल नै 32 गेंदें च 52 रंज बनाए। अज्ज कोलकाता दे ईडन गार्डन च कोलकाता नाईट राईड्स दा मकाबला दिल्ली कैपिटल्स कन्नै होग। एह् मैच अज्ज संजा साढ़े 7 बजे शुरू होग।

<><><><><><>